

四庫全書

史部

欽定四庫全書

史部

五代史卷六十三至

詳校官編修_{臣黃壽齡}

洗馬_{臣王坦修}覆勘

覆校官中書_{臣龔敬身}

校對官監丞_{臣張曾炳}

謄錄貢生_{臣劉為幹}

欽定四庫全書

五代史卷六十三

宋

歐

陽

修

撰

前蜀世家第三

王建字光圖許州舞陽人也為人隆眉廣額狀貌偉然少無賴以屠牛盜驢販私鹽為事里人謂之賊王八後為忠武軍卒稍遷隊將黃巢陷長安僖宗在蜀忠武軍將鹿晏弘以兵八千屬楊復光討賊巢敗走復光以其

兵為八都都將千人建與晏弘皆為一都頭復光死晏弘率八都西迎僖宗于蜀所過剽略行至興元逐節度使牛勣自稱留後僖宗即以晏弘為節度使晏弘以建等八都頭皆領屬州刺史已而晏弘擁衆東歸陷陳許建與晉暉韓建張造李師泰等各率一都西奔于蜀僖宗得之大喜號隨駕五都以屬十軍觀軍容使田令孜令孜以建等為養子僖宗還長安使建與晉暉等將神策軍宿衛光啟元年河中王重榮與令孜爭鹽池重榮

召晉兵犯京師僖宗幸鳳翔二年三月移幸興元以建
為清道使使負玉璽以從行至當塗驛李昌符焚棧道
棧道幾斷建控僖宗馬冒煙焰中過宿坂下僖宗枕建
膝寢既覺涕泣解御衣賜之僖宗已至興元令孜以謂
天子播越由已致之懼且得罪西川節度使陳敬瑄令
孜同母弟也令孜因求為西川監軍楊復恭代為軍容
使復恭出建為壁州刺史建乃招集亡命及溪洞夷落
有衆八千以攻閬州執其刺史楊行遷又攻利州利州

刺史王珙棄城走敬瑄患之以問令孜令孜曰王八吾兒也以一介召之可置麾下乃使人招建東川顧彥朗與建有舊建聞令孜召已大喜因至梓州謂彥朗曰十軍阿父召我我欲至成都見陳公以求一鎮即以其家屬託彥朗選精兵二千馳之成都行至鹿頭關敬瑄悔召建使人止之建大怒擊破鹿頭關取漢州彥朗聞之出兵助建軍于學射敬瑄遣將句惟立逆建建擊敗之遂攻彭州敬瑄遣眉州刺史山行章將兵五萬屯新繁

建又擊敗之掠獲萬餘人橫尸四十里敬瑄發兵七萬
益行章與建相持濛陽新都百餘日昭宗遣左諫議大
夫李珣為兩川宣諭和協使詔彥朗等罷兵彥朗請以
大臣鎮蜀因為建求旌節文德元年六月以宰相韋昭
度為西川節度使分邛蜀黎雅為永平軍拜建節度使
敬瑄不受代昭宗即命昭度將彥朗等兵討之昭宗以
建為招討牙內都指揮使久之不克建謂昭度曰公以
數萬之衆困兩川之人而師久無功柰何且唐室多故

東方諸鎮兵接都畿公當歸相天子靜中原以固根本
此蠻夷之國不足以留公昭度遲疑未決建遣軍士擒
昭度親吏於軍門嚮而食之建入白曰軍士饑須此為
食爾昭度大恐即留符節與建而東昭度已去建即以
兵扼劔門兩川由是阻絕山行章屯廣都建擊敗之行
章走眉州以州降建建引兵攻成都而資簡戎茂嘉珣
諸州皆殺刺史降建建攻成都甚急田令孜登城呼建
曰老夫與公相厚何嫌而至此建曰軍容父子之恩心

何可忘然兵討不受代者天子命也令孜夜入建軍以
節度觀察牌印授建明日敬瑄開門迎建建將入城以
張勅為都虞候戒其軍士曰吾以張勅為虞候矣汝等
無犯其令幸勅執而見我我尚活汝使其殺而後白吾
亦不能詰也建入城軍士剽略勅殺百人而後止建遷
敬瑄于雅州使人殺之復以令孜為監軍既而亦殺之
大順二年十月唐以建為檢校司徒成都尹劍南西川
節度副大使知節度事管内觀察處置雲南八國招撫

等使東川顧彥朗卒其弟彥暉立唐遣宦者宗道弼賜
彥暉東川旌節絳州刺史常厚執道弼以攻梓州建遣
李簡王宗滌等討厚自彥朗死建欲圖并東川而未有
以發及李簡等討厚戒曰兵已破厚彥暉必出犒師即
與俱來無煩吾再舉也簡等擊厚敗之鍾陽厚走還絳
州以唐旌節還道弼而出之彥暉已得節辭疾不出犒
軍乾寧二年建遣王宗滌攻之十二月宗滌敗彥暉于
楸林斬其將羅璋遂圍梓州三年五月昭宗遣宦者袁

易簡詔建罷兵建收兵還成都黔南節度使王肇以其地降于建四年宗滌復攻東川別遣王宗侃宗阮等出峽取渝瀘州五月建自將攻東川昭宗遣諫議大夫李洵判官韋莊宣諭兩川詔建罷兵建不奉詔乃責授建南州刺史以郟王為鳳翔節度使徙李茂貞代建為西川節度使茂貞拒命乃復建官爵冬十月建攻破梓州彥暉自殺彥暉將顧彥瑤顧城已危謂諸將吏曰事公當生死以之指其所佩賓鐵劍曰事急而有叛者當齒

此劍及城將破彥瑤與彥暉召集將吏飲酒遂與之俱死建以王宗滌為東川留後唐即以宗滌為節度使於是并有兩川之地是時鳳翔李茂貞兼據梁洋秦隴數以兵侵建天復元年梁太祖兵誅宦者韓全誨等劫天子幸鳳翔梁兵圍之茂貞閉城拒守經年力窘求與梁和建間遣人聘茂貞許以出兵為援勸其堅壁勿和遣王宗滌將兵五萬聲言迎駕以攻興元執其節度使李繼業而武定節度使拓拔思敬遂以其地降于建於是

并有山南西道是時荆南成汭死襄州趙匡凝遣其弟
匡明襲據之建乘其間攻下夔施忠萬四州三年八月
唐封建蜀王四年唐遷都洛陽改元天祐建與唐隔絕
而不知故仍稱天復天復六年又取歸州於是并有三
峽七年梁滅唐遣使者諭建建拒而不納建因馳檄四
方會兵討梁四方知其非誠實皆不應是歲正月巨人
見青城山六月鳳皇見萬歲縣黃龍見嘉陽江而諸州
皆言甘露白鹿白雀龜龍之瑞秋九月己亥建乃即皇

帝位封其諸子為王以王宗佶為中書令韋莊為左散
騎常侍判中書門下事唐襲為樞密使鄭騫為御史中
丞張格王鉞為翰林學士周博雅為成都尹蜀恃險而
富當唐之末人士多欲依建以避亂建雖起盜賊而為
人多智詐善待士故其僭號所用皆唐名臣世族莊見
素之孫格濬之子也建謂其左右曰吾為神策軍將時
宿衛禁中見天子夜召學士出入無間恩禮親厚如寮
友非將相比也故建待格等恩禮尤異其餘宋玘等

百餘人並見信用武成元年正月祀天南郊大赦改元以王宗佶為太師宗佶本姓甘氏建為忠武軍卒時掠得之養以為子後以軍功累遷武信軍節度使後建所生子元懿等稍長宗佶以養子心不自安與鄭騫等謀求為大司馬總六軍開元帥府凡軍事便宜行而後聞建以宗佶創業功多優容之唐襲本以舞僮見幸於建宗佶尤易之後為樞密使猶名呼襲襲雖內恨而外奉宗佶愈謹建聞之怒曰宗佶名呼我樞密使是將反邪

宗佶求大司馬章三上建以問襲襲因激怒建曰宗佶功臣其威望可以服人心陛下宜即與之建心益疑宗佶入奏事自請不已建叱衛士撲殺之并賜寯死六月以遂王宗懿為皇太子建加尊號英武睿聖皇帝七月騶虞見武定二年頒永昌歷黃都嘉禾合穗三年八月有龍五十見洵陽水中十月麟見壁州十二月大赦改明年為永平元年岐王李茂貞自為梁所圍而山南入于蜀地狹勢孤遂與建和以其子娶建女因求山南故

地建怒不與以王宗侃為北路都統宗佑宗賀唐襲為
三面招討使以攻岐戰于青泥宗侃敗績退保西縣為
茂貞兵所圍建自將擊之岐兵敗解去建至興元而還
加尊號曰英武睿聖光孝皇帝二年又加號曰英武睿
聖神功文德光孝皇帝初田令孜之為監軍也盜唐傳
國璽入于蜀而埋之二月尚食使歐陽柔治令孜故第
穿地而得之以獻五月梁遣光祿卿盧玘來聘推建為
兄其印文曰大梁入蜀之印宰相張格曰唐故事奉使

四夷其印文曰大唐入某國之印今梁以兄事陛下奈何卑我如僕隸建怒欲殺梁使者格曰此梁有司之過爾不可以絕兩國之懽已而梁太祖崩建遣將作監李紘弔之遂刻其印文曰大蜀入梁之印劔州木連理六月麟見文州十二月黃龍見富義江三年正月麟見永泰五月騶虞見壁山有二鹿隨之秋七月皇太子元膺殺太子少保唐襲元膺建次子也初名宗懿後更名宗坦建得銅牌子于什仿有文二十餘字建以為符讖因

取以名諸子故又更曰元膺元膺為人猥喙齟齬多材
藝能射錢中孔嘗自抱畫毬擲馬上馳而射之無不中
年十七為皇太子判六軍創天武神機營開永和府置
官屬建以元膺年少任重以記事戒之令一切學朕所
為則可以保國又命道士廣成先生杜光庭為之師唐
襲建之嬖也元膺易之屢謫于朝建懼其交惡乃罷襲
樞密出為興元節度使已而襲罷歸元膺廷疏其過失
建益不悅是月七夕元膺召諸王大臣置酒而集王宗

翰樞密使潘峭翰林學士毛文錫不至元膺怒曰集王
不來峭與文錫教之耳明日元膺白建峭及文錫離間
諸王建怒將罪之元膺出而襲入建以問之襲曰太子
謀作亂欲召諸將諸王以兵錮之然後舉事爾建疑之
襲請召屯營軍入衛元膺初不為備聞襲召兵以為誅
已乃與伶人安悉香軍將喻全殊率天武兵自衛遣人
擒峭及文錫而笞之幽於其家召大將徐瑤常謙率兵
出拒襲與襲戰神武門襲中流矢墜馬死建遣王宗賀

以兵討之元膺兵敗皆潰去元膺匿躍龍池檻中明日
出而丐食蜀人識之以告建遣宗翰招諭之宗翰未至
為衛兵所殺建乃立其幼子鄭王宗衍為太子白龍見
邛州江四年荆南高季昌侵蜀巫山遣嘉王宗壽敗之
于瞿唐八月殺黔南節度使王宗訓冬南蠻攻掠界上
建遣夔王宗範擊敗之于大渡河麟見昌州五年起壽
昌殿於龍興宮畫建像於壁又起扶天閣畫諸功臣像
十一月大火焚其宮室遣王宗儔等攻岐取其秦鳳階

成四州至于大散關梁叛將劉知俊在岐於是以其族
來通正元年遣王宗綰等率兵十二萬出大散關攻岐
取隴州八月起文思殿以清資五品正員官購羣書以
實之以內樞密使毛文錫為文思殿大學士黃龍見大
昌池十月大赦改元十二月又改明年元曰天漢國號
漢天漢元年殺劉知俊十二月大赦改明年元曰光天
復國號蜀光天元年六月建卒年七十二建晚多內寵
賢妃徐氏與妹淑妃皆以色進專房用事交結宦者唐

文宸等干與外政建年老昏耄文宸判六軍事無大小皆決文宸及建疾以兵入宿衛謀盡去建故將故將大臣聞建疾皆不得入見久之宗弼等排闥入言文宸欲為變乃殺之建因以謂老將大臣多許昌故人必不為太子用思擇人未得而疾亟乃以宦者宋光嗣為樞密使判六軍而建卒太子立去宗名衍

衍字化源建十一子曰衛王宗仁簡王元膺趙王宗紀幽王宗輅韓王宗智莒王宗特信王宗傑魯王宗鼎興

王宗澤薛王宗平而鄭王宗衍最幼其母徐賢妃也以
母寵得立為皇太子開崇賢府置官屬後更曰天策府
衍為人方頤大口垂手過膝顧目見耳頗知學問能為
浮艷之詞元膺死建以幽王宗輅貌類已信王宗傑於
諸子最材賢欲於兩人擇立之而徐妃專寵建老昏耄
妃與宦者唐文扆教相士言衍相最貴又諷宰相張格
贊成之衍由是得為太子建卒衍立謚建曰神武聖文
孝德明惠皇帝廟號高祖陵曰永陵建正室周氏號昭

聖皇后後建數日而卒衍因尊其母徐氏為皇太后后
妹淑妃為皇太妃太后太妃以教令賣官自刺史以下
每一官闕必數人並爭而入錢多者得之通都大邑起
邸店以奪民利衍年少荒淫委其政於宦者宋光嗣光
祿景潤澄王承休歐陽晃田魯儔等而以韓昭潘在迎
顧在珣嚴旭等為狎客起宣華苑苑有重光太清延昌
會真之殿清和迎仙之宮降真蓬萊丹霞之亭飛鸞之
閣瑞獸之門又作怡神亭與諸狎客婦人日夜酣飲其

中嘗以九日宴宣華苑嘉王宗壽以社稷為言言發流涕韓昭等曰嘉王酒悲爾諸狎客共以慢言謔嘲之坐上諠然衍不能省也蜀人富而喜遨當王氏晚年俗競為小帽僅覆其頂俛首即墮謂之危腦帽衍以為不祥禁之而衍好戴大帽每微服出遊民間民間以大帽識之因令國中皆戴大帽又好裹尖巾其狀如錐而後宮皆戴金蓮花冠衣道士服酒酣免冠其髻髻然更施朱粉號醉粧國中之人皆效之嘗與太后太妃游青城山

宮人衣服皆畫雲霞飄然望之若仙衍自作甘州曲述其仙狀上下山谷衍常自歌而使宮人皆和之衍立之明年改元乾德乾德元年正月祀天南郊大赦加尊號為聖德明孝皇帝二年冬北巡至于西縣旌旗戈甲連亘百餘里其還也自閬州浮江而上龍舟畫舸照耀江水所在供億人不堪命三年正月還成都五年起上清宮塑王子晉像尊以為聖祖至道玉宸皇帝又塑建及衍像侍立於其左右又於正殿塑玄宗皇帝及唐諸帝

備法駕而朝之六年以王承休為天雄軍節度使天雄軍秦州也承休以官者得幸為宣徽使承休妻嚴氏有絕色衍通之是時唐莊宗滅梁蜀人皆懼莊宗遣李嚴聘蜀衍與俱朝上清而蜀都士庶簾帷珠翠夾道不絕嚴見其人物富盛而衍驕淫歸乃獻策伐蜀明年唐魏王繼岌郭崇韜伐蜀是歲衍改元曰咸康衍自立歲常獵于子來山是歲又幸彭州陽平山漢州三學山以王承休妻嚴氏故十月幸秦州羣臣切諫衍不聽行至梓

潼大風發屋拔木太史曰此貪狼風也當有敗軍殺將者行不省行至縣谷而唐師入其境衍懼遽還唐師所至州縣皆迎降衍留王宗弼守縣谷遣王宗勳宗儼宗昱率兵以拒唐師宗勳等至三泉望風退走衍詔宗弼誅宗勳等宗弼反與宗勳等合謀送款於唐師衍自縣谷還至成都百官及後宮迎謁七里亭衍雜宮人作回鶻隊以入明日御文明殿與其羣臣相對涕泣而宗弼亦自縣谷馳歸登大玄門收成都尹韓昭宦者宋光嗣

景潤澄歐陽晃等殺之函首送于繼岌行即上表乞降
宗弼遷行于天啟宮魏王繼岌至成都衍君臣面縛輿
櫬出降于七里亭莊宗召衍入洛賜衍詔曰固當列土
而封必不薄人于險三辰在上一言不欺衍捧詔忻然
就道率其宗族及偽宰相王鐸張格庾傳素許寂翰林
學士李昊等及諸將佐家族數千人以東同光四年四
月行至秦川驛莊宗用伶人景進計遣宦者向延嗣誅
其族衍母徐氏臨刑呼曰吾兒以一國迎降反以為戮

信義俱棄吾知其禍不旋踵矣衍妾劉氏鬢髮如雲而
有色行刑者將免之劉氏曰家國喪亡義不受辱遂就
死宗弼本姓魏名弘夫建錄為養子建攻顧彥暉宗弼
常以建語泄之彥暉者彥暉敗建待之如初建病且卒
宗弼守太師兼中書令判六軍輔政衍已降宗弼以蜀
珍寶奉魏王及郭崇韜求為西川節度使魏王曰此我
家物也何以獻為居數日為崇韜所殺宗壽許州民家
子也建以同姓錄之為子宗壽好學工琴奕為人恬退

喜道家之術事建時為鎮江軍節度使衍既立宗壽為太子太保奉朝請以煉丹養氣自娛衍為淫亂獨宗壽常切諫之後為武信軍節度使唐師伐蜀所在迎降魏王常以書招之獨宗壽不降聞衍已銜壁大慟從衍東遷至岐陽以賄賂守者得入見衍衍泣下霑襟曰早從王言豈有今日衍死宗壽至澠池聞莊宗遇弒亡入熊耳山天成二年出詣京師上書求衍宗族葬之明宗嘉其忠以為保義軍行軍司馬封衍順正公許以諸侯禮

葬宗壽得王氏十八喪葬之長安南三趙村

嗚呼自秦漢以來學者多言祥瑞雖有善辯之士不能祛其惑也予讀蜀至於龜龍麟鳳騶虞之類世道所謂王者之嘉瑞莫不畢出於其國異哉然考王氏之所以興亡成敗者可以知之矣或以為一王氏不足以當之則視時天下治亂可以知之矣龍之為物也以不見為神以升雲行天為得志今偃然暴露其形是不神也不上于天而下見於水中是失職也然其一何多歟可以

為妖矣鳳皇鳥之遠人者也昔舜治天下政成而民悅
命夔作樂樂聲和鳥獸聞之皆鼓舞當是之時鳳皇適
至舜之史因并記以為美後世因以鳳來為有道之應
其後鳳皇數至或出於庸君繆政之時或出於危亡大
亂之際是果為瑞哉麟獸之遠人者也昔魯哀公出獵
得之而不識蓋索而獲之非其自出也故孔子書於春
秋曰西狩獲麟者譏之也西狩非其遠也獲麟惡其盡
取也狩必書地而哀公馳騁所涉地多不可徧以名舉

故書西以包衆地謂其舉國之西皆至也麟人罕識之
獸也以見公之窮山竭澤而盡取至於不識之獸皆搜
索而獲之故曰譏之也聖人已沒而異端之說興乃以
麟為王者之瑞而附以符命讖緯詭怪之言鳳嘗出於
舜以為瑞猶有說也及其後出於亂世則可以知其非
瑞矣若麟者前有治世如堯舜禹湯文武周公之世未
嘗一出其一出而當亂世然則孰知其為瑞哉龜玄物
也污泥川澤不可勝數其死而貴於卜官者用適有宜

爾而戴氏禮以其在宮沼為王者難致之瑞戴禮雜出於諸家其失亦以多矣騶虞吾不知其何物也詩曰吁嗟乎騶虞賈誼以為騶者文王之囿虞虞官也當誼之時其說如此然則以之為獸者其出於近世之說乎夫破人之惑者難與爭於篤信之時待其有所疑焉然後從而攻之可也麟鳳龜龍王者之瑞而出於五代之際又皆萃于蜀此雖好為祥瑞之說者亦可疑也因其可疑而攻之庶幾惑者有以思焉

據前蜀書運歷圖九國志皆云建以唐大順二

年入成都為西川節度使天復七年九月建號明年正月改元武成今以為定惟舊五代史云龍紀元年入成都天祐五年建號改元者謬也至後唐同光三年蜀滅則諸書皆同自大順二年至同光三年凡三十五年

五代史卷六十三

五代史卷六十三考證

王建傳僖宗幸鳳翔二年三月移幸興元○元監本訛
化今從本紀改正

昭宗遣諫議大夫李洵判官韋莊宣諭兩川○上文云
遣左諫議大夫李珣為兩川宣諭和協使此云李洵
恐是一人而前後互異

以郢王為鳳翔節度使○郢各本作剡今從監本

五代史卷六十三考證

欽定四庫全書

五代史卷六十四

宋

歐

陽

修

撰

後蜀世家第四

孟知祥字保胤邢州龍岡人也其叔父遷當唐之末據邢洺磁三州為晉所虜晉王以遷守澤潞梁兵攻晉遷以澤潞降梁知祥父道獨留事晉而不顯及知祥壯晉王以其弟克讓女妻之以為左教練使莊宗為晉王以

知祥為中門使前此為中門使者多以罪誅知祥懼求他職莊宗命知祥薦可代已者知祥因薦郭崇韜自代崇韜德之知祥遷馬步軍都虞候莊宗建號以太原為北京以知祥為太原尹北京留守魏王繼岌伐蜀郭崇韜為招討使崇韜臨訣白曰即臣等平蜀陛下擇帥以守西川無如孟知祥者已而唐兵破蜀莊宗遂以知祥為成都尹劔南西川節度副大使知祥馳至京師莊宗戒有司盛供帳多出內府珍奇諸物以宴勞之酒酣語

及平昔以為笑樂歎曰繼岌前日乳臭兒爾乃能為吾
平定兩川吾徒老矣孺子可喜然益令人悲爾吾憶先
帝棄世時疆土侵削僅保一隅豈知今日奄有天下九
州四海奇珍異產充牣吾府因指以示知祥曰吾聞蜀
土之富無異於此以卿親賢故以相付同光四年正月
戊辰知祥至成都而崇韜已死魏王繼岌引軍東歸先
鋒康延孝反攻破漢州知祥遣大將李仁罕會任圜董
璋等兵擊破延孝知祥得其將李肇侯弘實及其兵數

千以歸而莊宗崩魏王繼岌死明宗入立知祥乃訓練
兵甲陰有王蜀之志益置義勝定遠驍銳義寧飛掉等
軍七萬餘人命李仁罕趙延隱張業等分將之初魏王
之班師也知祥率成都富人及王氏故臣家得錢六百
萬緡以犒軍其餘者猶二百萬任圜自蜀入為相兼判
三司素知蜀所餘錢是冬知祥加拜侍中乃以太僕卿
趙季良齎官告賜之因以為三川制置使督蜀犒軍餘
錢送京師且制置兩川征賦知祥怒不奉詔然知祥與

李良有舊遂留之樞密使安重誨頗疑知祥有異志思有以制之初知祥鎮蜀莊宗以宦者焦彥賓為監軍明宗入立悉誅宦者罷諸道監軍彥賓已罷重誨復以客省使李嚴為監軍嚴前使蜀既歸而獻策伐蜀蜀人皆惡之而知祥亦怒曰焦彥賓以例罷而諸道皆廢監軍獨吾軍置之是嚴欲以蜀再為功也掌書記母昭裔及諸將吏皆請止嚴無內知祥曰吾將有以待其來嚴至境上遣人持書候知祥知祥盛兵見之冀嚴懼而不來

嚴聞之自若天成二年正月嚴至成都知祥置酒召嚴是時焦彥賓雖罷猶在蜀嚴於懷中出詔示知祥以誅彥賓知祥不聽因責嚴曰今諸方鎮已罷監軍公何得來此目客將王彥銖執嚴下斬之明宗不能詰初知祥鎮蜀遣人迎其家屬于太原行至鳳翔鳳翔節度使李從曠聞知祥殺李嚴以為知祥反矣遂留之明宗既不能詰而猶欲以恩信懷之乃遣客省使李仁矩慰諭知祥并送瓊華公主及其子昶等歸之知祥因請趙李良

為節度副使事無大小皆與參決三年唐徙李良為果
州團練使以何瓚為節度副使知祥得制書匿之表留
季良不許乃遣其將雷廷魯至京師論請明宗不得已
而從之是時瓚行至緜谷懼不敢進知祥乃奏瓚為行
軍司馬是歲唐師伐荆南詔知祥以兵下峽知祥遣毛
重威率兵三千戍夔州已而荆南高季興死其子從誨
請命知祥請罷戍兵不許知祥諷重威以兵鼓譟潰而
歸唐以詔書劾重威知祥奏請無劾由是唐大臣益以

知祥為必反四年明宗將有事于南郊遣李仁矩責知祥助禮錢一百萬緡知祥覺唐謀欲困已辭不肯出久之請獻五十萬而已初魏王繼岌東歸留精兵五千戍蜀自安重誨疑知祥有異志聽言事者用已所親信分守兩川管內諸州每除守將則以精兵為其牙隊多者二三千少者不下五百人以備緩急是歲以夏魯奇為武信軍節度使分東川之閬州為保寧軍以李仁矩為節度使又以武虔裕為縣州刺史仁矩與東川董璋有

隙而虔裕重誨表兄由是璋與知祥皆懼以謂唐將致討自璋鎮東川未嘗與知祥通問於是璋始遣人求婚以自結而知祥心恨璋欲不許以問趙季良季良以謂宜合從以拒唐知祥乃許於是連表請罷還唐所遣節度刺史等明宗優詔慰諭之長興元年二月明宗有事于南郊加拜知祥中書令初知祥與璋俱有異志而安重誨信言事者以為璋盡忠於國獨知祥可疑重誨猶欲倚璋以圖知祥是歲九月董璋先攻破閬州擒李

仁矩殺之是月應聖節知祥開宴東北望再拜俯伏嗚咽泣下沾襟士卒皆為之歔歔明日遂舉兵反是秋明宗改封瓊華公主為福慶長公主有司言前世公主受封皆未出降無遣使就蕃冊命之儀詔有司草具新儀乃遣祕書監劉岳為冊使岳行至鳳翔聞知祥反乃旋明宗下詔削奪知祥官爵命天雄軍節度使石敬瑭為都招討使夏魯奇為副知祥遣李仁罕張業趙廷隱將兵三萬人會璋攻遂州別遣侯弘實將四千人助璋守

東川又遣張武下峽取渝州唐師攻劔門殺璋守兵三千人遂入劔門璋來告急知祥大駭遣廷隱分兵萬人以東已而聞唐軍止劔州不進喜曰使唐軍急趨東川則遂州解圍吾勢沮而兩川搖矣今其不進吾知易與爾十二月敬瑭及廷隱戰于劔門唐師大敗張武已取渝州武病卒其副將袁彥超代將其兵又取黔州二年正月李仁罕克遂州夏魯奇死之知祥以仁罕為武信軍留後遣人馳魯奇首示敬瑭軍敬瑭乃班師利州李

彥珂聞唐軍敗東歸乃棄城走知祥以趙廷隱為昭武軍留後李仁罕進攻夔州刺史安崇阮棄城走以趙季良為留後是時唐軍涉險以餉道為艱自潼關以西民苦轉饋每費一石不能致一斗道路嗟怨而敬瑭軍既旋所在守將又皆棄城走明宗憂之以責安重誨重誨懼遽自請行而重誨亦以被讒得罪死明宗以謂致知祥等反由重誨失策及重誨死乃遣西川進奏官蘇愿進奉軍將杜紹本西歸招諭知祥具言知祥家屬在京

師者皆無恙知祥聞重誨誅死而唐厚待其家屬乃邀
璋欲同謝罪璋曰孟公家屬皆存而我子孫獨見殺我
何謝為知祥三遣使往見璋璋不聽乃遣觀察判官李
昊說璋璋益疑知祥賣已因發怒以語侵昊昊乃勸知
祥攻之而璋先襲破知祥漢州知祥遣趙廷隱率兵三
萬自將擊之陣雞距橋知祥得璋降卒衣以錦袍使持
書招降璋璋曰事已及此不可悔也璋軍士皆譟曰徒
曝我於日中何不速戰璋即麾軍以戰兵始交璋偏將

張守進來降知祥乘之璋遂大敗走過金鴈橋麾其子
光嗣使降以保家族光嗣哭曰自古豈有殺父而求生
者乎寧俱就死因與璋俱走知祥遣趙廷隱追之不及
璋走至梓州見殺光嗣自縊死知祥遂并有東川然自
璋死知祥卒不遣使謝唐唐樞密使范延光曰知祥雖
已破璋必借朝廷之勢以為兩川之重自非屈意招之
彼亦不能自歸也明宗曰知祥吾故人也本因間諜致
此危疑撫吾故人何屈意之有先是克寧妻孟氏知祥

妹也莊宗已殺克寧孟氏歸于知祥其子瓌留事唐為供奉官明宗即遣瓌歸省其母因賜知祥詔書招慰之知祥兼據兩川以趙李良為武泰軍留後李仁罕武信軍留後趙廷隱保寧軍留後張業寧江軍留後李肇昭武軍留後李良等因請知祥稱王以墨制行事議未決而瓌至蜀知祥見瓌倨慢九月瓌自蜀還得知祥表請除趙李良等為五鎮節度其餘刺史以下得自除授又請封蜀王且言福慶公主已卒明宗為之發哀遣閭門

使劉政恩為宣諭使政恩復命知祥始遣其將朱滉來朝四年二月癸亥制以知祥檢校太尉兼中書令行成都尹劔南東西兩川節度管内觀察處置統押近界諸蠻兼西山八國雲南安撫制置等使遣工部尚書盧文紀冊封知祥為蜀王而趙季良等五人皆拜節度使唐兵先在蜀者數萬人知祥皆厚給其衣食因請送其家屬明宗詔諭不許十一月明宗崩明年閏正月知祥乃即皇帝位國號蜀以趙季良為司空同中書門下平章

事中門使王處回為樞密使李昊為翰林學士三月唐
潞王舉兵於鳳翔愍帝遣王思同等討之思同兵潰山
南西道節度使張虔釗武定軍節度使孫漢韶皆以其
地附于蜀四月知祥改元曰明德六月虔釗等至成都
知祥宴勞之虔釗奉觴起為壽知祥手緩不能舉觴遂
病以其子昶為皇太子監國知祥卒謚為文武聖德英
烈明孝皇帝廟號高祖陵曰和陵

昶知祥第三子也知祥為兩川節度使昶為行軍司馬

知祥僭號以昶為東川節度使同中書門下平章事知祥病昶監國知祥已卒而祕未發喪王處回夜過趙季良相對泣涕不已季良正色曰今彊侯握兵專伺時變當速立嗣君以絕非望泣無益也處回遂與季良立昶而後發喪昶立不改元仍稱明德至五年始改元曰廣政明德三年三月熒惑犯積尸昶以謂積尸蜀分也懼欲禳之以問司天少監胡韞韞曰按十二次起井五度至柳八度為鶉首之次鶉首秦分也蜀雖屬秦乃極南

之表爾前世火入鬼其應多在秦晉咸和九年三月火
犯積尸四月雍州刺史郭權見殺義熙十四年火犯鬼
明年雍州刺史朱齡石見殺而蜀皆無事昶乃止昶好
打毬走馬又為方士房中之術多採良家子以充後宮
樞密副使韓保貞切諫昶大悟即日出之賜保貞金數
斤有上書者言臺省官當擇清流昶歎曰何不言擇其
人而任之左右請以其言詰上書者昶曰吾見唐太宗
初即位獄吏孫伏伽上書言事皆見嘉納奈何勸我拒

諫耶然昶年少不親政事而將相大臣皆知祥故人知祥寬厚多優縱之及其事昶益驕蹇多踰法度務廣第宅奪人良田發其墳墓而李仁罕張業尤甚昶即位數月執仁罕殺之并族其家是時李肇自鎮來朝杖而入見稱疾不拜及聞仁罕死遽釋杖而拜廣政九年趙季良卒張業益用事業仁罕甥也仁罕被誅時業方掌禁兵昶懼其反乃用以為相業兼判度支置獄于家務以酷法厚歛蜀人蜀人大怨十一年昶與匡聖指揮使

安思謙謀執而殺之王處回趙廷隱相次致仕由是故將舊臣殆盡昶始親政事於朝堂置匭以通下情是時契丹滅晉漢高祖起于太原中國多故雄武軍節度使何建以秦成階三州附于蜀昶因遣孫漢韶攻下鳳州於是悉有王衍故地漢將趙思綰據永興王景崇據鳳翔反皆送款于昶昶遣張虔釗出大散關何建出隴右李廷珪出子午谷以應思綰昶相母昭裔切諫以為不可然昶志欲窺關中甚銳乃遣安思謙益兵以東已而

漢誅思綰景崇虔釗等皆罷歸而思謙恥於無功多殺士卒以威衆昶與翰林使王藻謀殺思謙而邊更有急奏藻不以時聞輒啟其封昶怒之其殺思謙也藻方侍側因并擒藻斬之十二年置吏部三銓禮部貢舉十三年昶加號睿文英武仁聖明孝皇帝封子玄喆秦王判六軍事次子玄珏襲王弟仁毅襲王仁贇雅王仁裕嘉王十八年周世宗伐蜀攻自秦州昶以韓繼勲為雄武軍節度聞周師來伐歎曰繼勲豈足以當周兵耶客省

使趙季札請行乃以季札為秦州監軍使季札行至德陽聞周兵至遽馳還奏事昶召問之季札惶懼不能道一言昶怒殺之乃遣高彥儔李廷珪出堂倉以拒周師彥儔大敗走青泥於是秦成階鳳復入于周昶懼分遣使者聘于南唐東漢以張形勢二十年世宗以所得蜀俘歸之昶亦歸所獲周將胡立于京師因寓書于世宗世宗怒昶無臣禮不答二十一年周兵伐南唐取淮南十四州諸國皆懼荆南高保融以書招昶使歸周昶以

前嘗致書世宗不答乃止昶幼子玄寶生七歲而卒太常言無服之殤無贈典昶問李昊昊曰昔唐德宗皇子評生四歲而卒贈揚州大都督封肅王此故事也昶乃贈玄寶青州大都督追封遂王二十五年立秦王玄喆為皇太子昶幸晉漢之際中國多故而據險一方君臣務為奢侈以自娛至於溺器皆以七寶裝之宗興已下荆潭昶益懼遣大程官孫遇以蠟丸書間行東漢約出兵以撓中國遇為邊吏所得太祖皇帝遂詔伐蜀遣王

全斌崔彥進等出鳳州劉光乂曹彬等出歸州詔八作
司度右掖門南臨汴水為昶治第一區凡五百餘間供
帳什物皆具以待昶昶遣王昭遠趙彥韜等拒命昭遠
成都人也年十三事東郭禪師智諲為童子知祥嘗飯
僧於府昭遠執巾履從智諲以入知祥見之愛其惠黠
時昶方就學即命昭遠給事左右而見親狎昶立以為
捲簾使樞密使王處回致仕昶以樞密使權重難制乃
以昭遠為通奏使知樞密使事然事無大小一以委之

府庫金帛恣其所取不問昶母李太后常為昶言昭遠不可用昶不聽昭遠好讀兵書以方略自許兵始發成都昶遣李昊等餞之昭遠手執鐵如意指揮軍事自比諸葛亮酒酣謂昊曰吾之是行何止克敵當領此二三萬雕面惡少兒取中原如反掌爾昶又遣子玄喆率精兵數萬守劔門玄喆輦其愛姬携樂器伶人數十以從蜀人見者皆竊笑全斌至三泉遇昭遠擊敗之昭遠焚吉柏江浮橋退守劔門軍頭向韜得蜀降卒言來蘇小

路出劔門南清彊店與大路合全斌遣偏將史延德分
兵出來蘇北擊劔門與全斌夾攻之昭遠彥韜敗走皆
見擒玄喆聞昭遠等敗亦逃歸劉光乂攻夔州夔州守
將高彥儔戰敗閉牙城拒守判官羅濟勸其走彥儔曰
吾昔不能守秦川今又奔北雖人主不殺我我何面目
見蜀人乎又勸其降彥儔不許乃自焚死而蜀兵所在
奔潰將帥多被擒獲昶問計於左右老將石頤以謂東
兵遠來勢不能久宜聚兵堅守以敝之昶歎曰吾與先

君以溫衣美食養士四十年一旦臨敵不能為吾東向
放一箭雖欲堅壁誰與吾守者耶乃命李昊草表以降
時乾德三年正月也自興師至昶降凡六十六日初昊
事王衍為翰林學士衍之亡也昊為草降表至是又草
馬蜀人夜表其門曰世修降表李家當時傳以為笑昶
至京師拜檢校太師兼中書令封秦國公七日而卒追
贈楚王其母李氏為人明辯甚見優禮詔書呼為國母
嘗召見勞之曰母善自愛無戚戚思蜀他日當送母歸

李氏曰妾家本太原僅得歸老故鄉不勝大願是時劉
鈞尚在太祖大喜曰侯平劉鈞當如母願昶之卒也李
氏不哭以酒酹地祝曰汝不能死社稷苟生以取羞吾
所以忍死者以汝在也吾今何用生為因不食而卒其
餘事具國史

知祥興滅年數甚明諸書皆同蓋自同光
二年乙酉入蜀至皇朝乾德三年乙丑國
滅凡四十一年惟舊五代史云同光三年
丙戌至乾德三年乙丑四十年者謬也

五代史卷六十四

五代史卷六十四考證

孟知祥傳命李仁罕趙延隱張業等分將之○延當作廷

目客將王彥銖執嚴下斬之○銖一本作鉢

知祥始遣其將朱滉來朝○滉監本作濕今從南本

五代史卷六十四考證

欽定四庫全書

五代史卷六十五

宋

歐

陽

修

撰

南漢世家第五

劉隱其祖安仁上蔡人也後徙閩中商賈南海因家焉
父謙為廣州牙將唐乾符五年黃巢攻破廣州去略湖
湘間廣州表謙封州刺史賀江鎮遏使以禦梧桂以西
歲餘有兵萬人戰艦百餘艘謙三子曰隱台巖謙卒廣

州表隱代謙封州刺史乾寧中節度使劉崇龜死嗣薛王知柔代為帥行至湖南廣州將盧琚單玘作亂知柔不敢進隱以封州兵攻殺琚玘迎知柔知柔辟隱行軍司馬其後徐彥若代知柔表隱節度副使委以軍政彥若卒軍中推隱為留後天祐二年拜隱節度使梁開平元年加檢校太尉兼侍中二年兼靜海軍節度安南都護三年加檢校太師兼中書令封南平王隱父子起封州遭世多故數有功於嶺南遂有南海隱復好賢士是

時天下已亂中朝人士以嶺外最遠可以辟地多游焉
唐世名臣謫死南方者往往有子孫或當時仕宦遭亂
不得還者皆客嶺表王定保倪曙劉濬李衡周傑楊洞
潛趙光胤之徒隱皆招禮之定保容管巡官曙唐太學
博士濬崇望之子以避亂往衡德裕之孫唐右補闕以
奉使往皆辟置幕府待以賓客傑善星歷唐司農少卿
因避亂往隱數問以災變傑恥以星術事人嘗稱疾不
起隱亦客之洞潛初為邕管巡官秩滿客南海隱嘗師

事之後以為節度副使及龔僭號為陳吉凶禮法為國制度略有次序皆用此數人焉乾化元年進封隱南海王是歲卒年三十八弟龔立

龔初名巖謙庶子也其母段氏生龔於外舍謙妻韋氏素妬聞之怒拔劍而出命持龔至將殺之及見而悸劍輒墮地良久曰此非常兒也後三日卒殺段氏養龔為己子及長善騎射身長七尺垂手過膝隱為行軍司馬龔亦辟薛王府諮議叅軍隱鎮南海龔為副使隱卒龔

代立乾化二年除清海軍節度使檢校太保同平章事
三年加檢校太傅末帝即位悉以隱官爵授龔龔封南
海王唐末南海最後亂僖宗以後大臣出鎮者天下皆
亂無所之惟除南海而已自隱始亦自立是時交州曲
顥桂州劉士政邕州葉廣略容州龐巨昭分據諸管盧
光稠據虔州以攻嶺上其弟光睦據潮州子延昌據韶
州高州刺史劉昌魯新州刺史劉潛及江東七十餘寨
皆不能制隱攻韶州龔曰韶州所賴者光稠擊之虔人

必應應則首尾受敵此不宜直攻而可以計取隱不聽
果敗而歸因盡以兵事付龔悉平諸寨遂殺昌魯等更
置刺史卒出兵攻敗盧氏取潮韶又西與馬殷爭容桂
殷取桂管擄士政龔取容管逐巨昭又取邕管隱龔自
梁初受封爵稟正朔而已貞明三年龔即皇帝位國號
大越改元曰乾亨追尊安仁文皇帝謙聖武皇帝隱襄
皇帝立三廟置百官以楊洞潛為兵部侍郎李衡禮部
侍郎倪曙工部侍郎趙光胤兵部尚書皆平章事光胤

自以唐甲族恥事偽國常怏怏思歸龔乃習為光肩手
書遣使間道至洛陽召其二子損益并其家屬皆至光
肩驚喜為盡心焉龔性聰悟而奇酷為刀鋸支解剗剔
之刑每視殺人則不勝其喜不覺朶頤垂涎呀呷人以
為真蛟蜃也又好奢侈悉聚南海珍寶以為玉堂珠殿
二年祀天南郊大赦境內改國號漢龔初欲僭號憚王
定保不從遣定保使荆南及還懼其非已使倪曙勞之
告以建國定保曰建國當有制度吾入南門清海軍額

猶在四方其不取笑乎龔笑曰吾備定保久矣而不思此宜其譏也三年冊越國夫人馬氏為皇后馬氏楚王殷女也四年春置選部貢舉放進士明經十餘人如唐故事歲以為常七年唐莊宗入汴龔懼遣宮苑使何詞入詢中國虛實稱大漢國主致書大唐皇帝詞還言唐必亂不足憂龔大喜又性好夸大嶺北商賈至南海者多召之使升宮殿示以珠玉之富自言家本咸秦恥王蠻夷呼唐天子為洛州刺史是歲雲南驃信鄭旻遣使

致朱髻白馬以求婚使者自稱皇親母弟清容布燮兼
理賜金錦袍虎綾紋攀金裝刀封歸仁慶侯食邑一千
戶持節鄭昭淳昭淳好學有文辭龔與游燕賦詩龔及
羣臣皆不能逮遂以隱女增城縣主妻是八年作南宮
王定保獻南宮七奇賦以美之龔初名巖又更曰陟九
年白龍見南宮三清殿改元白龍又更名龔以應龍見
之祥有番僧言識書滅劉氏者龔也龔乃採周易飛龍
在天之義為龔字音儼以名焉四年楚人以舟師攻封

州封州兵敗於賀江龔懼以周易筮之遇大有遂赦境
內改元曰大有遣將蘇章以神弩軍三千救封州章以
兩鐵索沉賀江中為巨輪於岸上築堤以隱之因輕舟
迎戰陽敗而奔楚人逐之章舉巨輪挽索鎖楚舟以彊
弩夾江射之盡殺楚人三年遣將李守鄺梁克貞攻交
趾擒曲承美承美至南海龔登儀鳳樓受俘謂承美曰
公常以我為偽廷今反面縛何也承美頓首伏罪乃赦
之承美顓子也克貞又攻占城掠其寶貨而歸四年愛

州楊廷藝叛攻交州刺史李進遜歸龍遣承旨程寶攻
廷藝寶戰死五年封子耀樞邕王龜圖康王洪度秦王
洪熙晉王洪昌越王洪弼齊王洪雅韶王洪澤鎮王洪
操萬王洪杲循王洪暉息王洪邈高王洪簡同王洪建
益王洪濟辨王洪道貴王洪照宜王洪政通王洪益定
王九年遣將軍孫德成攻蒙州不克十年交州牙將皎
公羨殺楊廷藝自立廷藝故將吳權攻交州公羨來乞
師襲封洪操交王出兵白藤以攻之襲以兵駐海門權

已殺公羨逆戰海口植鐵楸海中權兵乘潮而進洪操
逐之潮退舟還轢輓者皆覆洪操戰死龔收餘衆而還
十五年龔卒年五十四謚天皇帝廟號高祖陵曰康
陵子玠立

玠初名洪度封秦王龔子耀樞龜圖皆早死玠次當立
龔病卧寢中召右僕射王翻與語呼洪度洪熙小字曰
壽雋雖長然皆不足任吾事惟洪昌類我吾欲立之柰
何吾子孫不肖後世如鼠入牛角勢當漸小爾因泣下

獻款翻為龔謀出洪度以邕州洪熙容州然後立洪昌
為太子議已定崇文使蕭益入問疾龔以告之益諫曰
少者得立長者爭之禍始此矣由是洪度卒得立更名
玠改元曰光天尊母趙昭儀為皇太妃以晉王洪熙輔
政玠立果不能任事龔在殯召伶人作樂飲酒宮中裸
男女以為樂或衣墨線與娼女夜行出入民家由是山
海間盜賊競起妖人張遇賢自稱中天八國王攻陷循
州玠遣越王洪昌循王洪杲攻之遇賢圍洪昌等於錢

帛館裨將萬景忻陳道庠力戰挾二王潰圍而走玠莫能省嶺東皆亂洪熙日益進聲妓誘玠為荒恣玠亦頗疑諸弟圖已敕宦官守宮門入者皆露索洪熙洪杲洪昌陰遣陳道庠養勇士劉思潮譚令裡林少彊少良何昌延等習為角觝以獻玠玠宴長春宮以閱之玠醉起道庠與思潮等隨至寢門拉殺之盡殺其左右玠立二年年二十四謚曰殤弟晟立

晟初名洪熙封晉王既弑玠遂自立改元曰應乾以洪

昌為兵馬元帥知政事洪杲副元帥劉思潮等封功臣
晟既弑兄立不順懼衆不服乃益峻刑法以威衆已而
洪杲屢請討賊陰勸晟誅思潮等以止外議晟大怒使
使者夜召洪杲洪杲知不免乃留使者入具沐浴詣佛
前祝曰洪杲誤念來生王宮今見殺矣後世當生民家
以免屠害因涕泣與家人訣別然後赴召至則殺之冬
晟祀天南郊改元曰乾和羣臣上尊號曰大聖文武大
明至道大光孝皇帝二年夏遣洪昌祠襄帝陵於海曲

至昌華宮晟使盜刺殺之晟自殺洪杲由是與諸弟有隙而洪昌最賢龔素所欲立者晟尤忌之故先及害鎮王洪澤居邕州有善政是歲鳳皇見邕州晟怒使人酖殺之而諸弟相次皆見殺三年殺其弟洪雅又殺劉思潮等五人思潮等死陳道庠懼不自安其友鄧伸以荀悅漢紀遺之道庠莫能曉伸罵曰慙獠韓信誅而彭越醢皆在此書矣道庠悟益懼晟聞之大怒以道庠伸下獄皆斬於市夷其族以右僕射王翻為英州刺史使人

殺之於路五年晟弟洪弼洪道洪益洪濟洪簡洪建洪
暉洪照同日皆見殺六年遣工部郎中知制誥鍾允章
聘楚以求婚楚不許允章還晟曰馬公復能經略南土
乎是時馬希廣新立希萼起兵武陵湖南大亂允章具
言楚可攻之狀晟乃遣巨象指揮使吳珣內侍吳懷恩
攻賀州已克之楚人來救珣鑿大阱於城下覆箔於上
以土傅之楚兵逼城悉陷阱中死者數千楚人皆走珣
等攻桂州及連宜嚴梧蒙五州皆克之掠全州而還九

年冬又遣內侍潘崇徹攻郴州李景兵亦在與崇徹等
遇戰大敗景兵於宜章遂取彬州晟益得志遣巨艦指
揮使暨彥寶以兵入海掠商人金帛作離宮游獵故時
劉氏有南宮大明昌華甘泉玩華秀華玉清太微諸宮
凡數百不可悉紀宦者林延遇宮人盧瓊仙內外專恣
為殺戮晟不復省嘗夜飲大醉以瓜置伶人尚玉樓項
拔劍斬之以試劍因并斬其首明日酒醒復召玉樓侍
飲左右白已殺之晟歎息而已十年湖南王進達以兵

五萬率溪洞蠻攻郴州潘崇徹敗逵於壕石斬首萬餘級十一年晟病甚封其子繼興衛王旋興桂王慶興荆王保興祥王崇興梅王十二年晟親耕藉田交州吳昌濬遣使稱臣求節鉞昌濬者權子也權自龔時據交州龔遣洪操攻之洪操戰死遂棄不復攻權死子昌岌立昌岌卒弟昌濬立始稱臣於晟晟遣給事中李璵以旌節招之璵至白州昌濬使人止璵曰海賊為亂道路不通璵不果行晟殺其弟洪邈十三年又殺其弟洪政於

是龔之諸子盡矣顯德三年世宗平江北晟始惶恐遣使修貢於京師為楚人所隔使者不得行晟憂形於色又嘗自言知星末年月食牛女間出書占之歎曰吾當之矣因為長夜之飲十六年卜葬域於城北運甓為壙晟親臨視之是秋卒年三十九謚曰文武光聖明孝皇帝廟號中宗陵曰昭陵子鋹立

鋹初名繼興封衛王晟卒以長子立改元曰大寶晟性剛忌不能任臣下而獨任其嬖倖宦官宮婢延遇瓊仙

等至銀尤愚以謂羣臣皆自有家室顧子孫不能盡忠
惟宦者親近可任遂委其政於宦者龔澄樞陳延壽等
至其羣臣有欲用者皆闔然後用澄樞等既專政銀乃
與宮婢波斯女等淫戲後宮不復出省事延壽又引女
巫樊胡子自言玉皇降胡子身銀於內殿設帳幄陳寶
貝胡子冠遠遊冠衣紫霞裾坐帳中宣禍福呼銀為太
子皇帝國事皆決於胡子盧瓊仙龔澄樞等爭附之胡
子乃為銀言澄樞等皆上天使來輔太子有罪不可問

尚書左丞鍾允章叅政事深嫉之數請誅宦官宦官皆
仄目二年銀祀天南郊前三日允章與禮官登壇四顧
指麾宦者許彥真望見之曰此謀反耳乃拔劔升壇允
章迎叱之彥真馳走告允章反銀下允章獄遣禮部尚
書薛用丕治之允章與用丕有舊因泣下曰吾今無罪
自誣以死固無恨然吾二子皆幼不知父冤俟其長公
可告之彥真聞之罵曰反賊欲使而子報讐邪復入白
銀并捕二子繫獄遂族誅之陳延壽謂銀曰先帝所以

得傳陛下者由盡殺羣弟也勸鋹稍誅諸王鋹以為然
殺其弟桂王旋興是歲建隆元年也鋹將邵廷琄言於
鋹曰漢乘唐亂居此五十年幸中國有故干戈不及而
漢益驕於無事今兵不識旗鼓而人主不知存亡夫天
下亂久矣亂久而治自然之勢也今聞真主已出必將
盡有海內其勢非一天下不能已勸鋹修兵為備不然
悉珍寶奉中國遣使以通好鋹懵然莫以為慮惡廷琄
言直深恨之四年芝菌生宮中野獸觸寢門苑中羊吐

珠井旁石自立行百餘步而仆樊胡子皆以為符瑞諷羣臣入賀五年銀以宦者李托養女為貴妃專寵托為內太師居中專政許彥真既殺鍾允章惡龔澄樞等居己上謀殺之澄樞使人告彥真反族誅之七年王師南伐克郴州晟所遣將暨彥贇與其刺史陸光圖皆戰死餘衆退保韶州銀始思廷瑁言遣廷瑁以舟兵出洸口抗王師會王師退舍廷瑁訓士卒修戰備嶺人倚以為良將有譖者投無名書言廷瑁反銀遣使者賜死士卒

排軍門見使者訴廷琄無反狀不能救為立祠於洸口
八年交州吳昌文卒其佐呂處珣與峰州刺史喬知祐
爭立交趾大亂驩州丁璉舉兵擊破之琬授璉交州節
度九年南海民妻生子兩首四臂是時太祖皇帝詔李
煜諭琬使稱臣琬怒囚煜使者龔慎儀十三年詔潭州
防禦使潘美出師師次白霞琬遣龔澄樞守賀州郭崇
岳守桂州李托守韶州以備是歲秋潘美平賀州十月
平韶州又平桂州十一月平連州琬喜曰韶桂連賀本

屬湖南今北師取之足矣其不復南也其愚如此十二月平韶州開寶四年正月平英雄二州鉉將潘崇徹先降師次瀧頭鉉遣使請和求緩師二月師度馬逕鉉遣其右僕射蕭灌奉表降灌行鉉惶迫復令整兵拒命美等進師鉉遣其弟祥王保興率文武詣美軍降不納龔澄樞李托等謀曰北師之來利吾國寶貨爾焚為空城師不能駐當自還也乃盡焚其府庫宮殿鉉以海舶十餘悉載珍寶嬪御將入海宦官樂範竊其舟以逃歸師

次白田銀素衣白馬以降獻俘京師赦銀為左千牛衛

大將軍封恩赦侯其後事具國史

隱興滅年世諸書皆同蓋自唐天祐二年

隱為廣州節度使至宋開寶四年國滅凡六十七年舊五代史以梁貞明三年龔僭號為始故曰五十五年爾

五代史卷六十五

五代史卷六十五考證

劉鋹傳十二月平韶州○上文已書十月平韶州又平
桂州此復云平韶州當必有誤但各本俱同姑仍之

五代史卷六十五考證

欽定四庫全書

五代史卷六十六

宋

歐

陽

修

撰

楚世家第六

馬殷字霸圖許州鄆陵人也唐中和三年蔡州秦宗權遣孫儒劉建峯將兵萬人屬其弟宗衡略地淮南殷初為儒裨將宗衡等攻楊行密於揚州未克梁兵方急攻宗權宗權數召儒等儒不欲還宗衡屢趣之儒怒殺宗

衡自將其兵取高郵遂逐行密行密據宣州儒以兵圍之久不克遣殷與建峯掠食旁縣儒戰敗死殷等無所歸乃推建峯為帥殷為先鋒轉攻豫章略虔吉有衆數萬乾寧元年入湖南次澧陵潭州刺史鄧處訥發邵州兵戍龍回關建峯等至關降其戍將蔣勛建峯取勛鎧甲被先鋒兵張其旗幟直趨潭州至東門東門守者以為關兵戍還開門內之遂殺處訥建峯自稱留後僖宗授建峯湖南節度使殷為馬步軍都指揮使蔣勛求為

邵州刺史建峯不與勛率兵攻湘鄉建峯遣殷擊勛於邵州建峯庸人不能帥其下常與部曲飲酒譟呼軍卒陳膽妻有色建峯私之膽怒以鐵樞擊殺建峯軍中推行軍司馬張佶為帥佶將入府乘馬輒蹠齧傷佶髀佶卧病語諸將曰吾非汝主也馬公英勇可共立之諸將乃共殺膽磔其尸遣姚彥章迎殷於邵州殷至佶乘肩輿入府殷拜謁於庭中佶召殷上乃率將吏下北面再拜以位與之時乾寧三年也唐拜殷潭州刺史殷遣其

將秦彥暉李瓊等攻連邵郴衡道永六州皆下之桂管
劉士政懼遣其將陳可璠王建武等率兵守全義嶺殷
遣使聘于士政使者至境上可璠等不納殷怒遣瓊等
以兵七千攻之擒可璠等及其兵二千餘人悉阬之遂
圍桂管據士政盡取其屬州殷表瓊桂管觀察使四年
拜殷武安軍節度使初孫儒敗於宣州殷弟竇為楊行
密所執行密收儒餘兵為黑雲都以竇為指揮使竇從
行密攻戰數有功為人質重未嘗自矜行密愛之問竇

誰家子實曰馬殷弟也行密大驚曰汝兄貴矣吾今歸
汝可乎實不對他日又問之實謝曰臣孫儒敗卒也幸
公待以不死非殺身不足報湖南隣境朝夕聞殷動靜
足矣不願去也行密歎曰昔吾愛子之貌今吾得子之
心矣然勉為吾合二國之懽通商賈易有無以相資亦
所以報我也乃厚禮遣實歸殷大喜表實即度副使行
密遣其將劉存等攻杜洪圍鄂州殷遣秦彥暉許德勳
以舟兵救之已而杜洪敗死存等遂攻殷殷遣秦彥暉

拒於上流偏將黃璠以舟三百伏瀏陽口存等屢戰不勝乃致書於殷以求和殷欲許之彥暉曰淮人多詐將怠我師不可信急擊之存等退走黃璠以瀏陽舟截江合擊大敗之劉存及陳知新戰死彥暉取岳州梁太祖即位殷遣使修貢太祖拜殷侍中兼中書令封楚王荆南高季昌以兵斷漢口邀殷貢使殷遣許德勲攻其沙頭季昌求和乃止楊行密袁州刺史呂師周來奔師周勇健豪俠頗通緯候兵書自言五世將家懼不能免常

與酒徒聚飲醉則起舞悲歌慷慨泣下行密聞之疑其
有異志使人察其動靜師周益懼謂其裨將綦毋章曰
吾與楚人為敵境吾常望其營上雲氣甚佳未易敗也
吾聞馬公仁者待士有禮吾欲逃死於楚可乎章曰公
自圖之章舌可斷語不泄也師周以兵獵境上乃奔於
楚綦毋章縱其家屬隨之殷聞師周至大喜曰吾方南
圖嶺表而得此人足矣以為馬步軍都指揮使率兵攻
嶺南取昭賀梧州蒙隳富等州殷表師周昭州刺史朗州

雷彥恭名吳人攻平江許德勳擊敗之殷遣秦彥暉攻朗州彥恭奔於吳執其弟彥雄等七人送於梁於是澧州向瓌辰州宋鄴澁州昌師益等率溪洞諸蠻皆附於殷殷請升朗州為永順軍表張佶節度使殷乃請依唐太宗故事開天冊府置官屬太祖拜殷天冊上將軍殷以其弟寶為左相存為右相廖光圖等十八人為學士末帝時加殷武安武昌靜江寧遠等軍節度使洪鄂四面行營都統唐莊宗滅梁殷遣其子希範修貢京師上

梁所授都統印莊宗問洞庭廣狹希範對曰車駕南巡
纔堪飲馬爾莊宗嘉之莊宗平蜀殷大懼表求致仕莊
宗下璽書慰勞之明宗即位遣使修貢並賀明年正月
荆南高季昌執其貢使史光憲殷遣袁誼王環等攻之
至其城下季昌求和乃止殷初兵力尚寡與楊行密成
汭劉襲等為敵國殷患之問策於其將高郁郁曰成汭
地狹兵寡不足為吾患而劉襲志在五管而已楊行密
孫儒之仇雖以萬金交之不能得其歡心然尊王仗順

霸者之業也今宜內奉朝廷以求封爵而外誇隣敵然後退修兵農畜力而有待爾於是殷始修貢京師然歲貢不過所產茶茗而已乃自京師至襄唐郢復等州置邸務以賣茶其利十倍郁又諷殷鑄鉞鐵錢以十當銅錢一又令民自造茶以通商旅而收其算歲入萬計由是地大力完數邀封爵天成二年請建行臺明宗封殷楚國王有司言無封國王禮請如三公用竹冊乃遣尚書右丞李序持節以竹冊封之殷以潭州為長沙府建

國承制自置官屬以其弟賓為靜江軍節度使子希振
武順軍節度使次子希聲判內外諸軍事姚彥章為左
相許德勲為右相李鐸為司徒崔頴為司空拓拔常為
僕射馬珙為尚書文武皆進位謚其曾祖筠曰文肅祖
正曰莊穆父元豐曰景莊立三廟於長沙長興元年殷
卒年七十九詔曰馬殷官爵俱高無以為贈謚曰武穆
而已子希聲立

希聲字若訥殷次子也殷建國以希聲判內外諸軍事

荆南高季昌聞殷將高郁素教殷以計策而楚以彊患之嘗使諜者行間於殷殷不聽希聲用事諜者語希聲曰季昌聞楚用高郁大喜以為亡馬氏者必郁也希聲素愚以為然遽奪郁兵職郁怒曰吾事君王久矣亟營西山將老焉犬子漸大能咋人矣希聲聞之矯殷令殺郁殷老不復省事莫知郁死是日大霧四塞殷恠之語左右曰吾嘗從孫儒儒每殺不辜天必大霧豈馬步獄有寃死乎明日吏以狀白殷拊膺大哭曰吾荒耄如此

而殺吾勲舊顧左右曰吾亦不久於此矣明年殷薨希聲立授武安靜江等軍節度使希聲嘗聞梁太祖好食雞慕之乃日烹五十雞以供膳葬殷上潢希聲不入泣頓食雞肉數器而起其禮部侍郎潘起譏之曰昔阮藉居喪而食蒸豚世豈乏賢邪長興三年希聲卒追封衡陽王弟希範立

希範字寶規殷第四子也殷子十餘人嫡子希振長而賢其次希聲與希範同日生而希聲母袁夫人有美色

希聲以母寵得立而希振棄官為道士居於家故希聲卒而希範以次立襲殷官爵封楚王清泰二年賜以弓矢冠劍天福四年加希範天冊上將軍開封承制如殷故事希範好學善詩文士廖光圖徐仲雅李臯拓拔常等十八人皆故殷時學士希範性奢侈光圖等皆薄徒飲博謹呼獨常沉厚長者上書切諫光圖等惡之襄州安從進安州李金全叛晉高祖詔希範出兵希範遣張少敵以舟兵趨漢陽漕米五萬斛以饋軍金全等敗少

敵乃旋溪州刺史彭士然率錦獎諸蠻攻澧州希範遣
劉勅劉全明等以步卒五千擊之士然大敗勅等攻溪
州士然走獎州遣其子師暉率諸蠻酋降於勅溪州西
接牂牁兩林南通桂林象郡希範乃立銅柱為表命學
士李臯銘之於是南寧州酋長莫彥殊率其本部十八
州都雲酋長尹懷昌率其昆明等十二部牂牁張萬濬
率其夷播等七州皆附於希範希範作會春園嘉宴堂
其費鉅萬始加賦於國中拓拔常切諫以為不可希範

又作九龍殿以八龍繞柱自言身一龍也是時契丹滅
晉中國大亂希範牙將丁思覲廷諫希範曰先王起卒
伍以攻戰而得此州倚朝廷以制隣敵傳國三世有地
數千里養兵十萬今天子囚辱中國無主真霸者立功
之時誠能悉國之兵出荆襄以趨京師倡義於天下此
桓文之業也奈何耗國用而窮土木為兒女子之樂乎
希範謝之思覲瞋目視希範曰孺子終不可教也乃扼
喉而死開運四年希範卒年四十九謚曰文昭希廣立

希廣字德丕希範同母弟也希範平生惡拓拔常諫諍
常入謁希範呼閤者指常曰吾不欲見此人勿復內也
乃謝絕之及卧病始思常言以為忠召之託以希廣希
範卒常數勸希廣以位奉其兄希萼希廣不從希萼為
朗州節度使希範之卒希萼自朗州來奔喪希廣將劉
彥瑫謀曰武陵之來其意不善宜出兵迎之以備非常
使其解甲釋兵而後入張少敵周廷誨曰王能與之則
已不然宜早除之希廣泣曰吾兄也焉忍殺之分國而

治可也乃以兵迎希萼於硃石止之於碧湘宮厚賂以遣之希萼憤然而去乃遣使詣京師求封爵請置邸稱藩漢隱帝不許降璽書慰勞講解之希萼怒送款於李景舉兵攻長沙希廣遣劉彥瑫許可瓊等禦之彥瑫敗希萼於僕射洲希萼去誘溪洞諸蠻寇益陽希廣遣崔洪連以步卒七千屯湘鄉玉潭以遏諸蠻劉彥瑫以舟兵趨武陵攻希萼彥瑫敗於湄洲希廣大懼遣使請兵於京師漢隱帝不能出師希萼率舟兵沿江而上自號

順天將軍攻岳州刺史王贊堅城不戰希萼呼贊曰吾
昔約君同行今何異心乎贊曰君王兄弟不相容而責
將吏異心乎願君王入長沙不傷同氣臣其敢不盡節
希萼引兵去下湘鄉至長沙屯水西劉彥瑫許可瓊屯
水東彭師曷登城望水西軍入白希廣曰武陵兵驕雜
以蠻蜚其勢易破請令可瓊等陣山前臣以步兵三千
自巴溪渡江趨岳麓後夜擊之希廣以為可而可瓊已
陰送款於希萼遂沮其議明日師曷詣可瓊計事瞋目

叱之曰視汝反文在面豈欲投賊乎拂衣而出急白希廣請殺之希廣不聽希萼攻長樂門牙將吳宏楊滌戰於門中希萼少衄已而許可瓊奔於希萼宏滌聞之皆潰希廣率妻子匿於慈堂明日擒之希萼見之惻然曰此鈍夫也豈能為惡徒為左右惑之爾顧其下曰吾欲活之如何其下皆不對遂縊殺之乾祐三年希萼自立明年漢隱帝崩京師大亂希萼遂臣於李景景冊封希萼楚王希萼悉以軍政任其弟希崇希崇與楚舊將徐

威陸孟俊魯綰等謀作亂希萼置酒端陽門希宗辭以疾威等縱惡馬十餘匹以壯士執槓隨之突入其府劫庫兵縛希萼迎希宗以立希宗遣彭師畧廖偃囚希萼於衡山師畧奉希萼為衡山王臣於李景希宗懼亦請命於景景遣邊鎬入楚盡遷馬氏之族於金陵時周廣順元年也景封希萼楚王居洪州希宗領舒州節度使居揚州顯德三年世宗征淮下揚州下詔撫安馬氏子孫已而揚州復入於景希宗率其兄弟十七人歸京師

拜右羽林統軍希能左屯衛大將軍希貫右千牛衛大將軍希隱希濬希知希朗皆為節度行軍司馬

劉言吉州廬陵人也王進達武陵人也言初事刺史彭玕從玕奔楚言事希範為辰州刺史進達少為靜江軍卒事希萼為指揮使希萼攻希廣以進達為先鋒陷長沙長沙遭亂殘毀希萼使進達以靜江兵營緝之兵皆愁怨進達因擁之夜以長柯巨斧斫闕奔歸武陵希萼方醉不能省明旦遣將唐肅追之及於武陵肅戰大敗

而還進逵乃逐出留後馬光惠迎言於辰州以為帥進
逵自為副已而希萼將徐威等作亂縛希萼而立希崇
湖南大亂李景遣邊鎬入楚遷馬氏於金陵因并召言
言不從遣進逵與行軍司馬何景真等攻鎬於長沙鎬
敗走周廣順三年言奉表京師以邀封爵又言長沙殘
破不可居請移治所於武陵周太祖皆從之乃升朗州
為武平軍在武安軍上以言為節度使因以武安授進
逵進逵自以言已所迎立不為之下言患之二人始有

隙欲相圖進達謀曰言將可用者不過何景真朱全琇爾召而殺之言可取也是時劉晟取楚梧州宜蒙等州進達因白言召景真等會兵攻晟言信之遣景真全琇往至皆見殺乃舉兵襲武陵執言殺之奉表京師周太祖即以進達為武平軍節度使世宗征淮南授進達南面行營都統進達攻鄂州過岳州岳州刺史潘叔嗣進達故時同列待進達甚謹進達左右就叔嗣求賂叔嗣不與左右讒其短進達面罵之叔嗣慙恨語其下曰進

達戰勝而還吾無遺類矣進達入鄂州方攻下長山叔
嗣以兵襲武陵進達聞之輕舟而歸與叔嗣戰武陵城
外進達敗見殺

周行逢武陵人也與王進達俱為靜江軍卒事希範為
軍校進達攻邊鎬行逢別破益陽殺李景兵二千餘人
擒其將李建期進達為武安軍節度使拜行逢集州刺
史為進達行軍司馬進達與劉言有隙行逢為畫謀策
遂襲殺言進達據武陵行逢據潭州顯德元年拜行逢

武清軍節度使權知潭州軍府事潘叔嗣殺進達或勸其入武陵叔嗣曰吾殺進達救死而已武陵非吾利也乃還岳州遣其客將李簡率武陵人迎行逢於潭州行逢入武陵或請以潭州與叔嗣行逢曰叔嗣殺主帥罪當死以其迎我未忍殺爾若與武安是吾使之殺王公也召以為行軍司馬叔嗣怒稱疾不至行逢怒曰是又欲殺我矣乃陽以武安與之召使至府受命至則殺之行逢故武陵農家子少貧賤無行多慷慨大言及居武

陵能儉約自勉勵而性勇敢果於殺戮麾下將吏素恃功驕慢者一以法繩之大將十餘人謀為亂行逢召宴諸將酒半以壯士擒下斬之一境皆畏服民過無大小皆死夫人嚴氏諫曰人情有善惡安得一槩殺之乎行逢怒曰此外事婦人何知嚴氏不悅紹曰家田佃戶以公貴頗不力農多恃勢以侵民請往視之至則營居以老歲時衣青裙押佃戶送租入城行逢往就見之勞曰吾貴矣夫人何自苦耶嚴氏曰公思作戶長時乎民租

後時常苦鞭朴今貴矣宜先期以率衆安得遂忘壠畝
間乎行逢彊邀之以羣妾擁升肩輿嚴氏卒無留意因
曰公用法太嚴而失人心所以不欲留者一旦禍起田
野間易為逃死爾行逢為少損建隆三年行逢病召其
將吏以其子保權屬之曰吾起壠畝為團兵同時十人
皆以誅死惟衡州刺史張文表獨存然常怏怏不得行
軍司馬吾死文表必叛當以楊師璠討之如其不能則
嬰城勿戰自歸於朝廷行逢卒子保權立文表聞之怒

曰行逢與我起微賤而立功名今日安能北面事小兒
乎遂舉兵叛攻下潭州保權乞師於朝廷亦命楊師璠
討文表告以先人之言感激涕泣師璠亦泣顧其軍曰
汝見郎君乎年未成人而賢若此軍士奮然皆思自効
師璠至平津亭文表出戰大敗之初保權之乞師也太
祖皇帝遣慕容延釗討文表未至而文表為師璠所執
延釗兵入朗州保權舉族朝於京師其後事具國史

殷自

唐乾寧二年入湖南至周廣順
元年凡五十七年餘具年譜註

五代史卷六十六

五代史卷六十六考證

劉言王進逵附傳進逵因白言召景真等會兵攻晟○

監本兵作攻攻作破俱訛也

周行逢傳夫人嚴氏○

臣文清

按宋通鑑作夫人鄧氏

未知孰是

五代史卷六十六考證

欽定四庫全書

五代史卷六十七

宋

歐

陽

修

撰

吳越世家第七

錢鏐字具美杭州臨安人也臨安里中有大木鏐幼時與羣兒戲木下鏐坐大石指麾羣兒為隊伍號令頗有法羣兒皆憚之及壯無賴不喜事生業以販鹽為盜縣錄事鍾起有子數人與鏐飲博起嘗禁其諸子諸子多

竊從之遊豫章人有善術者望牛斗間有王氣牛斗錢塘分也因遊錢塘占之在臨安乃之臨安以相法隱市中陰求其人起與術者善術者私謂起曰占君縣有貴人求之市中不可得視君之相貴矣然不足當之起乃為置酒悉召縣中賢豪為會陰令術者徧視之皆不足當術者過起家鏐適從外來見起反走術者望見之大驚曰此真貴人也起笑曰此吾旁舍錢生爾術者召鏐至熟視之顧起曰君之貴者因此人也乃慰鏐曰子骨

法非常願自愛因與起訣曰吾求其人者非有所欲也
直欲質吾術爾明日乃去起始縱其子等與鏐遊時時
貸其窮乏鏐善射與槊稍通圖緯諸書唐乾符二年浙
西裨將王郢作亂石鑑鎮將董昌募鄉兵討賊表鏐偏
將擊郢破之是時黃巢衆已數千攻掠浙東至臨安鏐
曰今鎮兵少而賊兵多難以力禦宜出奇兵邀之乃與
勁卒二十人伏山谷中巢先鋒度險皆單騎鏐伏弩射
殺其將巢兵亂鏐引勁卒蹂之斬首數百級鏐曰此可

一用爾若大衆至何可敵邪乃引兵趨八百里八百里地名也告道旁媼曰後有問者告曰臨安兵屯八百里矣巢衆至聞媼語不知其地名皆曰嚮十餘卒不可敵况八百里乎遂急引兵過都統高駢聞巢不敢犯臨安壯之召董昌與鏐俱至廣陵久之駢無討賊意昌等不見用辭還駢表昌杭州刺史是時天下已亂昌乃團諸縣兵為八都以鏐為都指揮使成及為靖江都將中和二年越州觀察使劉漢宏與昌有隙漢宏遣其弟漢宥

都虞候辛約屯兵西陵鏐率八都兵渡江竊敵軍號斫其營營中驚擾因焚之漢宥等皆走漢宏復遣將黃珪何肅屯諸暨蕭山鏐皆攻破之與漢宏遇戰大敗之殺何肅辛約漢宏易服持膾刀以遯追者及之漢宏曰我宰夫也舉刀示之乃免四年僖宗遣中使焦居璠為杭越通和使詔昌及漢宏罷兵皆不奉詔漢宏遣其將朱褒韓公玖施堅實等以舟兵屯望海鏐出平水成及夜率奇兵破褒等於曹娥埭進屯豐山施堅實等降遂攻

破越州漢宏走台州台州刺史執漢宏送於鏐斬於會稽族其家鏐乃奏昌代漢宏而自居杭州光啟三年拜鏐左衛大將軍杭州刺史昌越州觀察使是歲畢師鐸囚高駢淮南大亂六合鎮將徐約攻取蘇州潤州牙將劉浩逐其帥周寶寶奔常州浩推度支催勘官薛朗為帥鏐遣都將成及杜稜等攻常州取周寶以歸鏐具軍禮郊迎館寶於樟亭寶病卒稜等進攻潤州逐劉浩執薛朗剖其心以祭寶然後遣其弟鉞攻徐約約敗走入

海追殺之昭宗拜鏐杭州防禦使是時楊行密孫儒爭淮南與鏐戰蘇常間久之儒為行密所殺行密據淮南取潤州而鏐亦取蘇常唐升越州威勝軍以董昌為節度使封隴西郡王杭州武威軍拜鏐都團練使以成及為副使及字弘濟與鏐同事攻討謀多出於及而鏐以女妻及子仁琇鏐乃以杜稜阮結顧全武等為將校沈崧皮光業林鼎羅隱為賓客景福二年拜鏐鎮海軍節度使潤州刺史乾寧元年加同中書門下平章事二年

越州董昌反昌素愚不能決事臨民訟以骰子擲之而勝者為直妖人應智王溫巫韓媼等以妖言惑昌獻鳥獸為符瑞牙將俛德儒謂昌曰曩時謠言有羅平鳥主越人禍福民間多圖其形禱祠之視王書名與圖類因出圖以示昌昌大悅乃自稱皇帝國號羅平改元順天分其兵為兩軍中軍衣黃外軍衣白銘其衣曰歸義副使黃竭切戒昌以為不可昌大怒使人斬竭持其首至罵曰此賊負我好聖明時三公不肯作乃自求死邪投

之圖中昌乃以書告鏐鏐以昌反狀聞昭宗下詔削昌
官爵封鏐彭城郡王浙江東道招討使鏐曰董氏於吾
有恩不可遽伐乃以兵三萬屯迎恩門遣其客沈滂諭
昌使改過昌以錢二百萬犒軍執應智等送軍中自請
待罪鏐乃還兵昌復拒命遣其將陳郁崔溫等屯香巖
石侯乞兵於楊行密行密遣安仁義救昌鏐遣顧全武
攻昌斬崔溫昌所用諸將徐珣湯白袁邠等皆庸人不
知兵遇全武輒敗昌兄子真驍勇善戰全武等攻之逾

年不能克真與其裨將刺羽有隙刺羽諧之昌殺真兵
乃敗全武執昌歸杭州行至西小江昌顧其左右曰吾
與錢公俱起鄉里吾嘗為大將今何面復見之乎左右
相對泣下因瞋目大呼投水死昭宗以宰相王溥鎮越
州溥請授鏐乃改威勝軍為鎮東軍拜鏐鎮海鎮東軍
節度使加檢校太尉中書令賜鐵券恕九死鏐如越州
受命還治錢塘號越州為東府光化元年移鎮海軍於
杭州加鏐檢校太師改鏐鄉里曰廣義鄉勲貴里鏐素

所居營曰衣錦營婺州刺史王壇叛附於淮南楊行密遣其將康儒應壇因攻睦州鏐遣其弟鉞敗儒於軒渚壇奔宣州昭宗詔鏐圖形凌煙閣升衣錦營為衣錦城石鑑山曰衣錦山大官山曰功臣山鏐游衣錦城宴故老山林皆覆以錦號其幼所嘗戲大木曰衣錦將軍天復二年封鏐越王鏐巡衣錦城武勇右都指揮使徐綰與左都指揮使許再思叛焚掠城郭攻內城鏐子傳瑛及其將馬綽陳為等閉門拒之鏐歸至北郭門不得入

成及代鏐與綰戰斬首百餘級綰屯龍興寺鏐微服踰城而入遣馬綽王榮杜建徽等分屯諸門使顧全武備東府全武曰東府不足慮可慮者淮南爾綰急必召淮兵淮兵至患不細矣楊公大丈夫今以難告必能閔我鏐以為然全武曰獨行事必不濟請擇諸公子可行者鏐曰吾嘗欲以元璩婚楊氏乃使隨全武如廣陵綰果召田頔於宣州全武等至廣陵行密以女妻元璩亟召頔還頔取鏐錢百萬質鏐子元瓘而歸天祐元年封鏐

吳王鏐建功臣堂立碑紀功列賓佐將校名氏於碑陰者五百人四年升衣錦城為安國衣錦軍梁太祖即位封鏐吳越王兼淮南節度使客有勸鏐拒梁命者鏐笑曰吾豈失為孫仲謀邪遂受之太祖嘗問吳越進奏吏曰錢鏐平生有所好乎吏曰好玉帶名馬太祖笑曰真英雄也乃以玉帶一匣打毬御馬十匹賜之江西危全諷等為楊渥所敗信州危仔倡奔於鏐鏐惡其姓改曰元開平二年加鏐守中書令改臨安縣為安國縣廣義

鄉為衣錦鄉三年加守太保楊渥將周本陳章圍蘇州
鏐遣其弟鋸鏐救之淮兵為水柵環城以銅鈴繫網沉
水中斷潛行者水軍卒司馬福多智而善水行乃先以
巨竹觸網淮人聞鈴聲遂舉網福乃過入城中其出也
亦然乃取其軍號內外夾攻號令相應淮人以為神遂
大敗之本等走擒其將閻丘直何明等四年鏐游衣錦
軍作還鄉歌曰三節還鄉兮掛錦衣父老遠來相追隨
牛斗無亭人無欺吳越一王駟馬歸乾化元年加鏐守

尚書令兼淮南宣潤等道四面行營都統立生祠於衣
錦軍鏐弟鏐居湖州擅殺戍將潘長懼罪奔於淮南二
年梁郢王友珪立冊尊鏐尚父末帝貞明三年加鏐天
下兵馬都元帥開府置官屬四年楊隆演取虔州鏐始
由海路入貢京師龍德元年賜鏐詔書不名唐莊宗入
洛鏐遣使貢獻求玉冊莊宗下其議於有司羣臣皆以
謂非天子不得用玉冊郭崇韜尤為不可既而許之乃
賜鏐玉冊金印鏐因以鎮海等軍節度授其子元瓘自

稱吳越國王更名所居曰宮殿府曰朝官屬皆稱臣起
玉冊金券詔書三樓於衣錦軍遣使冊新羅渤海王海
中諸國皆封拜其君長明宗初即位安重誨用事鏐致
書重誨書辭嫚重誨大怒是時供奉官烏昭遇韓玟使
吳越既還玟誣昭遇稱臣舞蹈重誨乃奏削鏐王爵元
帥尚父以太師致仕元瓘等遣人以絹表問道自陳安
重誨死明宗乃復鏐官爵長興三年鏐卒年八十一謚
曰武肅子元瓘立

元瓘字明實少為質於田頔頔叛於吳楊行密會越兵
攻之頔每戰敗歸即欲殺元瓘頔母常蔽護之後頔將
出語左右曰今日不勝必斬錢郎是日頔戰死元瓘得
歸鏐卧病召諸大將告之曰吾子皆愚懦不足任後事
吾死公等自擇之諸將泣下皆曰元瓘從王征伐最有
功諸子莫及請立之鏐乃出筦鑰數篋召元瓘與之曰
諸將許爾矣鏐卒元瓘立襲封吳越國王王冊金印皆
如鏐故事王延政自立於建州閩中大亂元瓘遣其將

仰詮薛萬忠等攻之逾年大敗而歸元瓘亦善撫將士
好儒學善為詩使其國相沈崧置擇能院選吳中文士
錄用之然性尤奢侈好治宮室天福六年杭州大火燒
其宮室迨盡元瓘避之火輒隨發元瓘大懼因病狂是
歲卒年五十五謚曰文穆子佐立

佐字祐立時年十三諸將皆少佐佐初優容之諸將稍
不法佐乃黜其大將章德安於明州李文慶於睦州殺
內都監杜昭達統軍使闕璠由是國中皆畏恐王延義

延政兄弟相攻卓儼明朱文進李仁達等自相篡殺連
兵不解者數年仁達附於李景已而又叛景兵攻之仁
達求救於佐佐名諸將計事諸將皆不欲行佐奮然曰
吾為元帥而不能舉兵邪諸將皆吾家素畜養獨不肯
以身先我乎有異吾議者斬乃遣其統軍使張筠趙承
泰等率兵三萬水陸赴之遣將誓軍號令齊整筠等大
敗景兵俘馘萬計獲其將楊業蔡遇等遂取福州而還
由是諸將皆服佐立七年襲封吳越國王王冊金印皆

如元瓘開運四年佐卒年二十謚曰忠獻弟俶立

俶字文德佐卒弟侔以次立初元瓘質於宣州以胡進
思戴憚等自隨元瓘立用進思等為大將佐既年少進
思以舊將自待甚見尊禮及侔立頗卑侮之進思不能
平侔大閱兵於碧波亭方第賞進思前諫以賞太厚侔
怒擲筆水中曰以物與軍士吾豈私之何見咎也進思
大懼歲除畫工獻鍾馗擊鬼圖侔以詩題圖上進思見
之大悟知侔將殺已是夕擁衛兵廢侔囚於義和院迎

俶立之遷侂於東府俶歷漢周襲封吳越國王賜玉冊
金印世宗征淮南詔俶攻常宣二州以牽李景俶治國
中兵以待景聞周師將大舉乃遣使安撫境上皆戒嚴
蘇州候吏陳滿不知景使以謂朝廷已克諸州遣使安
撫矣亟言於俶請舉兵以應俶相國吳程遽調兵以出
相國元德昭以為王師必未渡淮與程爭於俶前不可
奪程等攻常州果為景將柴克宏所敗程裨將邵可遷
力戰可遷子死馬前猶戰不顧程等僅以身免周師渡

淮俶乃盡括國中丁民益兵使邵可遷等以戰船四百艘水軍萬七千人至於通州以會期吳越自唐末有國而楊行密李昇據有江淮吳越貢賦朝廷遣使皆由登萊泛海歲常飄溺其使顯德四年詔遣左諫議大夫尹日就吏部郎中崔頌等使於俶世宗諭之曰朕此行決平江北卿等還當陸來也五年王師征淮正月克靜海軍而日就等果陸還世宗已平淮南遣使賜俶兵甲旗幟橐駝羊馬錢氏兼有兩浙幾百年其人比諸國號為

怯弱而俗喜淫侈偷生工巧自鏐世常重斂其民以事
奢僭下至雞魚卵殼必家至而日取每筭一人以責其
負則諸案吏各持其簿列於廷凡一簿所負唱其多少
量為筭數已則以次唱而筭之少者猶積數十多者至
筭百餘人尤不堪其苦又多掠得嶺南商賈寶貨當五
代時常貢奉中國不絕及世宗平淮南宋興荆楚諸國
相次歸命倣勢益孤始傾其國以事貢獻太祖皇帝時
倣嘗來朝厚禮遣還國倣喜益以器服珍奇為獻不可

勝數太祖曰此吾帑中物爾何用獻為太平興國三年
詔俶來朝俶舉族歸於京師國除其後事具國史

嗚呼天人之際為難言也非徒自古術者好奇而幸中
至於英豪草竊亦多自託於妖祥豈其欺惑愚衆有以
用之歟蓋其興也非有功德漸積之勤而黥髡盜販倨
起於王侯而人亦樂為之傳歟考錢氏之始終非有德
澤施其一方而百年之際虐用其人甚矣其動於氣象
者豈非其孽歟是時四海分裂不勝其暴又豈皆然歟

是皆無所得而推歟術者之言不中者多而中者少而

人特喜道其中者與

鐸世興滅諸書皆同蓋自唐乾寧二年為鎮海鎮東軍節度使兼有

兩浙至皇朝太平興國三年國除凡八十四年

五代史卷六十七

五代史卷六十七考證

錢鏐傳鏐以昌反狀聞昭宗下詔削昌官爵封鏐彭城郡王浙江東道招討使鏐乃以兵三萬屯迎恩門昌執應智等送軍中自請待罪鏐乃還兵○

臣文清

按

通鑑載鏐移書責昌昌不聽乃將兵三萬詣越州城下昌懼執首謀者送鏐請待罪鏐引兵還以狀聞又表請以本道兵討昌五月詔削董昌官爵委錢鏐討之以鏐為浙東招討使據此則鏐以兵三萬詣越州

城尚在未以狀聞之先而詔削昌官爵以鏐為招討使又在鏐表請討昌之後與本紀異

俶傳錢氏兼有兩浙幾百年俗喜淫侈工巧自鏐世常重斂其民以事奢侈下至雞魚卵殼必家至而日取

○臣文清

按通鑑胡三省注考異曰十國紀年謂鏐

窮極侈靡末年荒恣尤甚賦斂苛暴人苦其政吳越備史稱鏐節儉衣食用油布常膳惟羹漆器寢帳壞文穆夫人欲易以青繒鏐不許嘗除夜子孫鼓琴未

數曲曰聞者以我為長夜之飲也遂罷之又錢易家
話稱鏐公宴不貳羹載衣必三澣然後易按錢鏐起
于貧賤知民疾苦必不至窮極侈靡其奢汰暴斂之
事蓋其子孫所為也已上皆胡三省考異之說與世
家所載大異

五代史卷六十七考證